

新登縣志卷二十一

原序

景泰縣志序

東溪 沈慶

昔宋蘇文忠公爲杭郡守行縣問俗盛稱新城之美蓋以其山水明秀人物鍾靈讀書尙禮不事浮華俗亦殷富况官無訟牒閭巷絃歌誠爲美邑故自虞周而下歷漢唐宋人才之盛有如許遠杜稜之忠讜姚興孫陟之節義凌準羅隱之詩文具爲世之表表其他高邁之賢尙節之士方技之流莫能殫述是皆鍾光岳之英毓山川之秀功業聞望炳炳琅琅千載之下尙能使人想像風采矧在當時也耶肆惟聖朝維新治化風俗益淳賢才愈盛鴻儒碩彥

新登縣志

卷二十一

原序

肩摩踵接忠臣義士視昔有加其間志書所載間有脫略不無訛舛魯魚亥豕觀者悵然茲邑之名宦湖藩大叅凌公文琬老成碩德發身賢科敷歷中外芳踵昔賢以幡黃榮歸故里與鄉人話舊而談及之公即慨然以爲己任遂取先府君家藏縣尹耿侯所修舊本校讐訂正缺者補之訛者正之漫不可讀者一之刪其繁撮其要有如朝命誥勅詩文記序科貢名宦篇附類見坊巷觀宇道路橋梁建置沿革據事直書與凡可以扶世教而輔治化者悉增入之秩秩乎不翅綱舉目張而不紊也編次類詳繕寫成帙復於公暇捐俸錢梓冀永其傳公之用心亦爲至矣間出示予徵言以序始末於戲氣運有盛衰人物有顯晦向使是編而不遇公將淪

沒散逸爲魚蠹鼠齧之資耳何能揚古今名士之烈而傳世乎今茲散而復全晦而復顯誠若美玉之出深山明珠之起深淵鑠流光增重價俾人爭先快觀欲求一覽而不可得況得全書之盛乎蘇公稱羨其邑之美揆之於公爲益可驗志凡若干卷序事精詳義無滲漏實爲百世不刊之典予故撫其概以復幸觀者毋少忽焉是爲序景泰五年

新城縣志序

凌 誌

古者龍馬負圖出於河伏羲則之以畫卦神龜列文出於洛大禹因之以衍疇是皆發天地之藏闡幽微之奧耳圖經推原蓋本乎此後世有天文誌地理圖禹貢圖方輿勝覽等書不可歷數由此

新登縣志

卷二十一

原序

一一

觀之誌書之作豈非祖圖經之意歟洪惟太宗文皇帝首重其事命廷臣分布天下纂集成書以傳萬世今皇上復舉而行之於是郡有郡誌縣有縣誌皆所以載古今人物山川草木與夫忠貞節義文章詞賦之類使觀者一覽在目誠爲不易之盛典可有而不可無者也新城乃杭之望邑山明水秀土厚民淳其間鍾奇孕秀代不乏人若許遠杜稜之忠誠姚興孫陟之節義凌準羅隱之文章周雄父子之捍禦又皆爲表表者漢唐以來歷年旣遠譜牒無存皆莫之考予因先君子昇家藏乾道誌書一帙乃縣令耿公所修間多缺略如許遠忠臣也略而不傳周雄名神也抑而不錄未免乎遺珠之嘆予因旬宣之暇博採羣書缺者補之煩者去之復

增以國朝誥勅人物景勝及名公巨卿吟詠通輯成書捐俸梓以永其傳茲不揣寡陋僭序篇端以俟後之同志者尙靳爲我正之庶不沒人之善云

嘉靖袁志序

雨水 洪 貫

新城縣在宋乾道淳祐咸淳時皆有志至元而亡入國朝永樂初邑人禮部主事袁公璞搜訪遺編手自謄錄而益以所見聞爲新城志稿存而事多簡略至景泰初邑人胡藩少參凌公誌一再修之然所載文詞失之太冗茲寧國袁侯蒞政之暇每閱之而意有未愜欲更修之然不自滿假迺訪吾鄞士王文煥備書幣告數百里聘貫以司厥事實膚淺之學聞命汗然而驚媿然侯既介以將

新登縣志

卷二十一

原序

三

其意幣以導其誠貫敢辭乎至則侯出舊志而簡庠友袁麟凌養元羅繼元協厥心以相其事於是搜幽隱詢故老擴舊聞科條彙從一遵時制事之簡略者補之文之冗泛者刪之時則有司訓之陽胡君縉古之鄭君彥智亦各出所見聞以裨益之而公是非端去取袁侯實蒞焉是以僅閱月而告成嗚呼古者邦國之志小史所掌志以紀事固史官職也自非才擅三長者孰克膺斯責哉貫無能爲役者特因舊編本時事益以諸賢之見姑爲一邑紀事之成書以塞賢侯之命以俟後之人是正焉耳嘉靖八年二月

嘉靖聶志序

錢塘 吳 鼎

古者列國皆有史凡以紀天道之始終識人事之沿革鑒賢否陳

風俗而存一邦之典則也自罷侯置守而國史私志代不廢焉我明嘗採天下舊記而彙萃之曰一統志固已備一王法而正統以後百年之間未有載述使夫朝之善政鄉之美俗賢士大夫之職業人才物產之間出其歲月先後利病所繇咸湮沒而無傳非甚闕典歟而長吏方以簿書不報錢穀獄訟爲大故恬然視此彌文弗急况求其作述如古良史哉余於是而嘆聶新城之賢於人也新城邑小而制未備聶侯夙有志節爲政廉平始遷學育才稍稍修起諸典章既五載乃延前學博方君輩作縣志請余序之余惟列國更爲郡縣則編年之體更爲紀傳表志也亦宜今之志者舍司馬子長奚法哉夫表者標其宏綱志者識其條理紀以記主德

新登縣志

卷二十一

原序

四

傳以傳臣事綱目相關鉅細不紊序事之體當如是而已今天下大政載在國史非下邑所當紀其曰表曰志曰傳不猶有典則耶志分爲六卷曰縣邑曰疆域爲二表則大綱概舉矣曰地理曰溝洫曰建置曰學校曰職官曰選舉曰禮制曰稅賦曰藝文曰雜志爲十志則衆目畢張矣列傳凡十曰宦蹟曰名宦曰仕籍曰鄉賢則賢否可鑒曰忠義曰孝友曰貞節曰文學曰篤行曰雜傳則風俗可觀庶幾哉詳而不穢略而有體不虛美不蔽惡如斯志者不徒爲是邦之典則殆亦可備太史氏採錄云余於是重嘆聶侯之賢而喜方君知史法也作新城縣志序聶名瑩字廷光潯山人方名椿字廷永邑人嘉靖二十三年

嘉靖聶志序

徐江山

礪齋聶大夫守新城之五載重修邑志成過予請質予閱之終篇曰文勝哉夫志也者識也史也邑志邑之史也史之識事者也新城志識新城之事也曰沿革曰疆域曰城郭曰山川曰風俗曰賦貨曰學政曰禮祀曰名宦曰人物曰雜志皆事也彙而萃之綱分目列於稽其類舉在目前故志也者識其事也事貴實勝文勝非體也宋王韶之私撰晉陽秋序事典實稱爲佳史司馬子長作史記立紀傳書表世家之體或於篇端或就事末略斷數語辯而不華質而不俚其文直其事核誠良史也作志者宜取則哉斯不刊之典也大夫曰公言是矣請損之既數日復持就予予曰志哉志

新登縣志

卷二十一

原序

五

哉是得子長之意矣遂付諸梓大夫名瑩字廷光礪齋其別號安慶之澹山人由賢科守邑每事好問多政蹟志其一善云

嘉靖聶志序

海寧 張 涑

惟新城爲杭郡屬邑雖封壤褊小而名山大川人賢物產與他邑等則夫表識方輿刊釐往蹟紀載時事以垂憲方來者可無志乎景泰初邑人胡藩少參凌公誌首事搜羅嘉靖乙丑邑令寧國袁公澤繼加刪輯則亦既創厥始矣茲者澹山礪齋聶公以製錦高才鳴琴此邑弦歌之暇典籍是娛觀述作之未明悼文獻之將闕慨然自任思勒成一家之言迺咨諸邑人昌邑教諭方君椿稽其故實及咨教諭曾廷梅吳筮訓導李良佐庠生李復初羅繼元羅

文卿方煉凌養恬袁鶴鳴採其風議公遂操觚染翰殫意研精盡
黜近代之編門獨宗唐書之凡例條分縷析綱舉目張其考異也
必核其真其叙事也必約其旨其立論也必暢其義其纂言也必
鈎其元是故表縣邑具古今之興廢表疆域別道路之廣輸有以
見討論之詳焉志地理謹國險之防志溝洫先農事之本志建置
正體統之舊志學校隆教化之原志職官列法守之重志選舉示
明揚之公志禮制辨上下之式志食貨存中正之規志藝文宣製
作之美有以見綜理之密焉傳宦籍傳名宦而得失成敗之誠著
傳仕籍傳鄉賢而是非臧否之鑒昭傳忠義傳孝友傳貞節而子
臣夫婦之道彰傳文學傳篤行而文章節概之名顯有以見勸懲

之遠焉其視夫世之作者或鋪張景物文而太縟或直陳土俗質
而近俚可同年而語哉涑素邀遇知飫聞令德及觀斯志倍深嘆
嘉敢陳菲詞綴之末簡庶使後之覽者得公之用心云爾

萬曆縣志序

方廉

志之爲言識也弗識則墜矣夫苟識之失實則誕誕何以訓失叙
則冗冗何以觀失諂則私私何以信之三者吾懼之奚貴乎有志
哉古者列國皆有史識山川之阨塞人物之顯晦風俗之隆污政
事之臧否今之志猶古之史也可不慎歟吾新城之爲縣也僻處
山間地瘠而產薄俗嗇而用儉所謂惇厚朴茂之風則未始或泯
苟有志焉以詳識之則來蒞茲土者庶有稽憑而出治宜民無大

戾矣是志其可易易言哉自宋賢令耿公秉嘗志之而今已弗傳景泰間先進凌公誌嘗一修之嘉靖八年邑令袁君澤又一修之二十三年邑令聶君瑩又一修之是宜益詳且核叙而有文周而不比也而未免涉所謂三失焉垂今三十有餘年山川無恙而建置之興廢田賦之盈縮民俗之移易人物之消息視昔不無少殊者予嘗披閱舊編而欲增損之條理之竊有志焉顧驅策中外不遑筆札比歸田若有暇可爲而卒未爲者良有畏難慮始之心未忘也茲者默菴溫侯來令未膏而政通民和遇事輒考之志而輒病其不相符毅然欲爲訂正間以問余噫此余志也敢不力相我侯以成之哉於是凡邑事之關政體者周咨博訪以集衆知考古

新登縣志

卷二十一

原序

七

證今以補舊闕事欲其實文欲其叙記述欲其不私蓋屬草三月而略已具矣然文以行遠而余衰蹇才乏三長顧吳中故知周君天球者以文鳴於時乃語溫侯聘致之相與揚摧是非潤色詞藻冗者理之誕者汰之缺者補之詩文則以類而附見之蓋寓目而新城數百年之往跡殆不必索之掌故而無弗知矣溫侯將梓行之仍屬余爲之序余不佞聊以識其實云時萬曆三年乙亥長至日

萬曆縣志序

溫朝祚

萬曆甲戌朝祚授令新城入境四望則列岫拱翠二水環碧井里翬然風氣翕聚偉哉山川之勝誠東浙之奧區也即訪地誌以采

風焉鄉少司空雙江方公曰邑自明興以來凡修志者三矣然或華而寡要略而遺實未可以觀也朝祚謂考政章教匪志莫稽無志似亦無邑也舉軼振弊惟我司空是賴敢以請公曰志史類亦史案也吁維難哉競華藻者浮依黨比者調尙簡率者疎吾方以三敝是懼也姑緩以圖之我司空于暇之日攬撫遐軌蒐漁逸典閱數月而志草具又以虛受人商於所知名士周君天球而後出示余余讀而嘆曰古者史氏掌四方之志大司徒接以統邦國所以齊其政不易其俗也是編也博極鴻纖該括今昔辨疆域則參之圖經考建置則本乎碑版計田賦則訪之司牧定官師則準於仕籍采人物則協於鄉評附藝則見於條目立義以審制修詞以

審式即斯志之大端實史氏之遺意也爲之令者睹疆域則思乂安之規不有久而或玩者乎睹建置則思修輯之政不有久而或隳者乎睹田賦則時有登耗宜思通變以興利也睹官師則行有淑慝宜思精白以承休也睹人物恐其風教漸湮而心迹孰與辨之睹藝文恐其詞藻虛飾而古雅孰與敦之因事致思循名責實噫如是而志可以一日置耶說文曰志者志也言乎其從心也我司空端厚高朗沉毅有爲其仕也事功炳煥於朝宁其歸也風節表範於鄉閭咸此心之微措之也茲以之志夫邑豈不灼然其中正哉是故可傳可法而令之嗣來者將不俟入境而治理已有憑矣詩曰維桑與梓必恭敬止朝祚忝司茲土願與爾邦人共之謹

序志尾時萬曆四年仲冬之吉

康熙縣志序

張 瓚

邑之中令乎前者有人焉令乎後者有人焉前與後不皆接踵而至則其政若事必不能促膝而告語之也邑之中生乎前者有人焉生乎後者有人焉前與後不皆同時而處則其言若事必不及聚族而聽觀之也况乎前此千百年後此千百年山川不改城郭已非建置之興廢賦役之重輕官司科第之汗隆人物典章之詳略因革異宜今昔異勢烏從而知之又烏從而考之哉曰是賴有志夫志載一邑之文獻者也識大識小著往昭來治術文章犁然具備使前乎此者後乎此者一覽之餘不啻上下古今揖讓酬答

新登縣志

卷二十一

原序

九

于筆墨之間而左右之而商榷之志詎可以已哉新志肇宋乾道入元而亡明袁祠部凌大參以暨寧國袁公澹山聶公雙江方公嘗屢修之迨今百年闕焉失載瓚不敏來領斯邑嘗一補前人之未備然究以才儉三長中止會橫艾困敦天子允閣臣之請下郡縣纂輯成書瓚承命不敢隕越遂同學博盧君懋蘊延錢塘張子戩邑士袁子澣相與討論舊章綜核近事汰其冗者正其訛者續其闕者既綱舉而目張亦鴻纖之畢集俾令於此生於此者觀輪輿之廣狹山川之險易鄉土風俗之美惡知席封域而撫衆者非其地之謂也履廳事入學宮過壇壝祠廟知不成名而致力於神者終爲人鬼棄也按版圖察戶口登耗之數而知生聚之道宜詳

考賦役審盈虛勞逸之故而知平準之法宜通取我父老而鞠育之取我子弟而陶淑之知以食以誨猶懼曠瘠於此得寡過之方科第何以昔盛而今衰人物何以身微而名著知以德以言式資景行於此得觀感之助軼事亦采可補見聞之遺詩文必傳遜登風雅之選於此徵載籍之備志於是觀厥成矣爰以上答休命下俟將來一筆一削罔敢僭濫知我罪我付之春秋時康熙十二年癸丑夏

康熙縣志序

盧懋蘊

志者史之餘也按周官小史掌邦國之志外史掌四方之志以考吏治以察民風自封建易而郡縣史歸於內外無專官於是留心

新登縣志

卷二十一

原序

十

治術者始因時以考事隨時以徵教哀集典章次其闕失用備一方之攷稽然則今之志亦猶古之史也新城縣志自萬曆乙亥迄今癸丑百年之內事等亡篋典故淪於見聞忠孝委諸草莽識者悼之久矣余秉鐸東安職司文翰每欲執筆從事然志雖及之而學媿未逮會戊申容菴張公捧檄來新其學淹貫博洽擅著作才在新數月首梓羅江東集行世邑紳士即以縣志請侯亦唯唯商余將有事焉適朝廷欲修大清一統志命郡國搜輯遺書符下諸縣侯始凜然應命用是網羅舊聞博咨羣議凡有關於吏治民風者巨細并列觀戒互陳本之誠以廣其義推之政以大其用垂之遠以貞其教百年之事斷而復續一方之書缺而獲全於以上獻

當宁其亦有裨於史氏之採擇矣乎今而後賴侯之學新之志成
余之志亦遂矣故爲序以附簡末時康熙十二年歲次癸丑五月
康熙縣志序
袁英

志文乎哉志信也志私乎哉志公也志循名乎哉志其博綜而條
貫也數美備矣然而成之蓋有時數存焉新志肇自宋令耿公秉
嗣後明永樂初袁祠部璞景泰初凌少參誌嘉靖八年袁侯澤二
十三年聶侯瑩萬曆三年方司空廉代有修輯其間山川人物之
隆衰賦役解字之興革以及詩文方言鉅細諸事實缺者補之冗
者汰之揚摧潤色不謂不明且備矣然總以一代覈實之書踵往
事而條理之故其爲力視今差易也若夫我清定鼎初年潢池盜

弄猶熾廬舍旣已邱墟獻文於焉闕略爲此書者討遺文於焚掠
之餘訪故老於青燐之後冀其信而不誣核而有叙蓋憂憂乎難
之我侯容菴奉簡命來蒞茲土戊申歲下車釐剔諸大政後即毅
然以修志爲己任然猶遲回瞻顧於數年間者非辭勞也蓋亦懼
夫滄桑變遷之失實耳今承平久矣聖天子諮度方輿詔纂修以
大一統之模侯始銳意虛諏參今稽古備曩編所未備傳信史所
必傳大約疆界序列受之張子袁子而測星紀公是非一皆我侯
鳴琴之暇手自搜校而訂正焉故其爲書信而不誣核而有叙之
可永垂於勿替也夫以侯博洽淹雅之才奚難自勒成一家言而
猶俟仰遵功令以後周諮明備甫獲成書故曰數美備矣成之蓋

有時數存焉英也策名天朝捧檄鄜延渤海間倖所在免隕越而竊愧炳炳琅琅如昔祠部公暨少參司空諸君子出則立業處則立言於不朽也則又時數之不可同年而語者矣書成我侯屬英附言敢叙其始末如此云時康熙十二年癸丑夏

縣志補輯序

羅欲繡

邑之有志也所以誌一邑之山川賦役官師之績人文之盛節義之所表著者也蓋吾儒生天壤間俯仰古今靡弗窮究乃讀書分內事獨怪士之窮年咕嗶區區帖括間輒自命爲通儒而於戶外事語之茫然叩之惘然也如邑之有志往昔者不復稽已嘉靖初邑令袁君澤二十三年邑令聶君瑩取而修之嗣後多闕如也萬

新登縣志

卷二十一

原序

十二

曆初邑令溫君朝祚邑人中丞方公廉又起而修之自後又多闕如也乙酉潰卒盤踞城中取方志書板作薪余見而惻然以錢易得已闕失無序矣歷二十餘年莫有以此事爲亟務者戊申春青齊張君瓚來令余邑詢及志事余曰留意久矣然前所嚮得於潰卒者尙缺二十版張屬爲補之浹旬畢事癸丑張君慨然以修志爲己任延余贊襄適患病不克佐厥事後余病間取新志而閱之刪芟過甚較方志爲略而方志又略於凌戊午己未之交予旣購一統志文獻通攷讀之因以暇日從凌耆宿賡一處覓得東安誌又從凌子吉處假得新城志二集皆凌君文琬手筆而互有異同子兼採而錄之且芻蕪別拾凡有關乎一邑者悉備無遺然皆在

嘉靖初年事也以後則有方志可稽萬歷以後則有新志可考也亦曰吾儒生天壤間固將俯仰古今靡弗窮究矧乎桑梓之山川賦役官師人文節義之巨可不爲究心耶凡爲旬有四越三日而是書成始藏於家以俟後之君子有志於斯者其以是書上時康熙己未仲秋三日

新成縣志序

吳郡吳君塘以道光壬午奉大府檄權宰新城明年秋余承簡命自甬上移守杭州甫下車君來謁余曰塘不敏承乏新邑憶蘇公亂山深處長官清之句未嘗不心嚮往之賴俗淳事簡又比歲登財賦如額循分供職幸得免於咎戾顧念邑志久失修恐日以廢

新登縣志

卷二十一

原序

十三

墜今因都人士之請重爲纂輯延舊餘杭尹張君總其事敢以告余頗韙其言既脫藁即以示余且請序之余謂邑之有志猶國之有史也然其體裁實與史異史以紀一代而已果能據事直書而善惡自見斯亦足矣若夫一邑之地幅員較小而上下千百年間今昔異宜之故不知凡幾非徵引博則陋非決擇精則歧博且精矣而言之無文亦不足以信今而傳後蓋若是其難也君學問淹雅從政之暇取百餘年將墜之文獻毅然起而修之又不自是而質成於宿俾後之宰斯邑者辨風土之美惡稽戶口之登耗考政治之得失披覽圖籍一皆有得於心微君之賢不及此雖然新城治萬山中水木明瑟岡巒深秀其君子崇禮而尙義其小人務本

而食力至有白首不識訟庭者而君因得以其餘暇肆意蒐討勒爲成書謂非君之幸耶他日訪君深清之堂將與君流連觴詠重繪西崦人家之樂余非敢望東坡而君之才之治實足與晁氏後先相輝映也遂序而歸之道光三年歲次癸未冬十有一月誥授中憲大夫知浙江杭州府事前江西分巡廣饒九南水利兵備道督理九江關稅務兼管窯務欽差戶部坐糧廳戶部福建雲南司郎中浙江江南司員外郎湖廣司主事寧波府知府加三級紀錄五次聊城任蘭祐頓首拜撰

浙江新城縣志序

縣志肇自宋乾道邑令耿公明代遞有修續近世所傳萬曆志則

新登縣志

卷二十一

原序

十四

成於邑人方司空也國朝康熙十二年前令張君容菴修葺至今一百五十年未有續初繼業者嘉慶甲子劉君鳳池議修而不果近年國史館取郡縣土田風俗之宜典章文物制度之盛部符屢下邑無以應也庚辰歲武君靜圃嘗雅意於是會建會文館初成即奉調治劉城瀕行以是爲耿耿道光壬午秋余承乏來新甫下車邑紳耆儒合詞以志事爲請自維之陋顧不敢以不文辭蓋志之失修已久及此不徇邦人士之請而亟從事焉將歲久更難編香爰與學博趙君費君縣尉秦君謀所以補之者同里張君蒔塘向曾攝篆於此與諸紳士習遂迎來商榷張君以前志應詔修輯三月事竣不無遺漏今又益以百五十年之事蹟非率爾操觚所

能畢事於是延分纂定採訪以今年四月設局於城南集賢館余問與在城諸君親歷各鄉延訪而確論之以匡所未及閱六月乃成書爲卷二十有四爲類三十有六塘公餘詳加校核仰見我國家休養生息文治昌明如學校之典禮農田水利之興修戶口風俗之登懋一一卓越前代至良師賢牧顯宦通儒敦行之士勵節之女林立相望而東安山川清淑之氣亦有鍾毓而不窮者使置此不修其何以表此邦之美固如是粲然大備哉是志也協纂若姜君小枚巖君夢華以及分纂採訪諸君各殫心力至張君蒔塘通彼此之懷去門戶之見其虛懷樂善則慎之又慎者武君靜圃屢書注意今以是編寄閱當亦爲之慶快也時將付剞劂爰述其

緣起如此至修書大指見於凡例及各門小序者茲不復贅云道光癸未重九後一日知杭州府新城縣事吳縣吳塘識

新登縣志跋

本屆新邑修志開辦於民國六年惟彈丸之地經費爲難公欸既
尠贏餘籌措亦非咄嗟立就若因欸絀用鉅遽爾停滯則懼嘉言
懿行湮沒而不彰何足以發潛德之幽光而爲信世傳後之計畫
不免蹈因噎廢食之譏遂有發起預約券之議券四百餘張每張
計銀幣五元先收三元不足則酌量撥墊如是出資者得書書成
而欸不虛人心樂從者衆一舉而三善兼備議定實行設局採訪
網羅軼事次第編纂殫述舊聞而又恐未盡善不憚跋涉之勞就
正名流再三刪訂彙幾易而後定惜刊資待籌欸無從出邑有因
訟爭而以田入官者迺求善價而沽斯時適 德良 捧檄來宰是邦

新登縣志跋文

諮諏善道知志書功輟半途末由爲考獻徵文之助亟促成之欸
齊付梓訂印六百部乃印工未竣而欸猶闕爲山祗虧一篑尤宜
急進掘井已逮九仞行將及泉焉能惜一狐之腋而敝屣千金之
裘時縣議會參事會均成立共相籌商挪欸墊用待書價償之於
戲自修志以來碩學通儒草創討論修飾潤色昕夕從事莫不盡
心力而爲之迄今迭更歲序六閱星霜信乎其將畢也鉅矣壬戌
之秋此邦之人復加揣摩斟酌損益略事竄改重付手民告厥成
功期在指顧出版之日而山川文物鄉里先達與夫孝節義行足
以風世而勵俗者其事於焉以傳而躬與纂修之役同心同德協
力經營竭其才智聰明反覆推敲而不倦者其志於焉以慰而都

人士中心藏之引領跂踵抱先觀爲快之奢望而蘊蓄數年之久者其願於焉以償而德良躬逢盛事鴻篇鉅製得以觀成俾竟日久未竟之事業私衷竊自幸焉薦紳君子屬殿數言不揣固陋爰紀其實以誌不忘云爾

中華民國十一年秋九月知新登縣事青浦胡德良

